

DUTILONOMIYU

Ini Sa Libelu Sa Sabuhanan

Kagi I Mosis

Ini Denu Sa Libelu Dutilonomiyu

Na, iya selepangan sa kagi Dutilonomiyu sa keduwa di gulê tinulon i Mosis sa medoo uledin i Nemula diyà sa medoo tegeIslaél. Epat pulù gepalay dé sa lugay di egoh di anay migbegay sa medoo uledin dutu Getan Sinay dò, huenan di nematay dé sa medoo etaw binegayan uledin egoh iya, enù ka nelugay sa keipanawpanaw da dutu siedò melabel tanà mediyù dalesan.

Tinulon i Mosis dema sa medoo uledin i Nemula diyà kenagda egoh da mig-esud diyà sa tanà Moab, enù ka buyu da dé eglagbas diyà sa tanà Kanan sa tanà igpasad i Nemula diyà sa medoo tupù da egoh anay.

Na, diyà siini libelu tinulon i Mosis sa denu sa kealuk i Nemula sa medoo etaw hinemilì di owoy sa ketabang di kenagda. Huenan di, egpetulengtulengen sa medoo etaw di iya wé anì pedakelen da Nemula i diyà sa pedu da owoy anì pangunutan da ma. Amuk hediya sa baelan da, melugay da mugpà diyà sa tanà da owoy meumanan ma sa ketabang i Nemula diyà kenagda. Na, diyà siini libelu tinulon i Mosis dema sa medoo nebaelan da egoh da migseipanawpanaw diyà sa melabel tanà mediyù dalesan, dodoo endà langun di sa nekesulat diyà sa kagi Menubù.

Ini Sa Egoh I Mosis Mig-ikagi Diyà Sa Medoo TegeIslaél Anì Mangunut Da Diyà Si Nemula (Dutilonomiyu 4:1–14)

4 ¹Na, mig-ikagi Mosis i diyà sa medoo tegeIslaél, guwaen di, “Pangunuti yu sa langun uledin itulù ku diyà keniyu anì kumelalù yu owoy anì meheniyu ma sa tanà ibegay

i Datù Nemula diyà keniyu. Kagdi sa Nemula egpigtuuwen sa medoo tupù yu. ²Na, yoko egdugang duu sa uledin isugù ku diyà keniyu, owoy yoko ma egsiat duu. Pangunuti yu sa medoo uledin sa Datù yu si Nemula sa egtulonen ku diyà keniyu. ³Na, hinaa yu doo sa binaelan i Datù Nemula dutu siedò getan Piyol egoh di

mig-imatay sa langun tegeIslaél migpenemula sa inetaw Baal sa egpenemulawen sa medoo tegeKanan. ⁴Dodoo kiyu i medoo eg-udes egpangunut diyà si Datù Nemula sa egpigtuuwen yu, nehagtay yu doo pelà taman ini egoh di.”

⁵Guwaen i Mosis, “Igtulù ku dé diyà keniyu sa langun uledin igsugù i Datù Nemula diyà kenak. Pangunuti yu iya wé amuk umugpà yu dé diyà sa tanà buyu tepelen yu. ⁶Petudà yu sa kepangunut yu anì mehaa sa medoo etaw diyà sa medoo liyu tanà sa kilantek yu owoy sa ketiigan yu. Amuk dinegen da denu siini langun uledin, mikagi da, guwaen da, ‘Milantek doo siini medoo tegeIslaél owoy dakel ma sa ketiigan da.’ ⁷Na, apiya di pa duen egkegaga sa medoo liyu balangan etaw, endà duen sa nemula da nekeiling si Datù Nemula sa Nemula egpigtuuwen ta, enù ka kagdi sa egbulig kenita amuk duen sa kelikutan ta owoy egtabangan di ma kita sumalà dé sa egoh ta egpegeni tabang diyà kenagdi. ⁸Na, apiya di pa duen egkegaga sa medoo liyu etaw, endà duen sa liyu épê uledin lagà siini metudà uledin igtulù ku diyà keniyu ini egoh di.”

⁹Guwaen i Mosis, “Na, taman sa egoh yu nehagtay pelawà, tulik yu owoy hahaa

yu ma anì endà melipengan yu duu siedò medoo hinaa yu.

Pesagkat yu tulon diyà sa medoo anak yu owoy diyà sa medoo bébê yu ma ¹⁰denu sa agdaw egoh yu migtigdeg diyà sa taengan i Datù Nemula, sa Nemula egpigtuuwen ta, dutu Getan Sinay dò. Egoh iya, mig-ikagi diyà kenak anì setiponen ku sa medoo etaw, enù ka ungayà di dinegen da sa eg-ikagiyen di anì meketiig da mangunut diyà kenagdi taman sa egoh da nehagtay pelawà owoy anì itulù da ma diyà sa medoo anak da anì mangunut da ma. ¹¹Na, tulon yu diyà sa medoo anak yu sa egoh yu migtigdeg diyà sa esudan getan egoh di migdeleman danà sa mekepal ebel kedu diyà sa siloy apuy. ¹²Tulon yu ma sa egoh i Datù Nemula mig-ikagi diyà keniyu kedu diyà sa siloy apuy. Apiya di pa dinineg yu sa kagi di, endà doo hinaa yu duu sa lawa di. ¹³Igpetiig di ma diyà keniyu sa mebaelan yu anì petuuwen yu sa nesesasaran binaelan di diyà keniyu. Ini sa mebaelan yu, pangunuti yu sa Sepulù Uledin igsulat di diyà sa duwa melugpayang batu. ¹⁴Igsugù i Datù Nemula ma diyà kenak egoh iya anì itulù ku diyà keniyu sa langun uledin mepangunutan yu amuk umugpà yu diyà siedò tanà buyu tepelen yu.”

**Ini Sa Egoh I Mosis Mighawid Sa
Kepenemula Da Inetaw**

(Dutilonomiyu 4:15–24)

15Agulé mig-uman Mosis i eg-ikagi, guwaen di, “Egoh i Datù Nemula mig-ikagi diyà keniyu kedu diyà sa siloy apuy dutu Getan Sinay dò, endà hinaa yu duu sa lawa di apiya di pa dinineg yu sa kagi di. Huenan di, tulik yu temù 16anì endà mekesalà yu danà yu egbael sa inetaw, sumalà dé sa egoh-egoh di, iling ka sa palas maama ataw ka éhê palas bayi, 17ataw ka éhê palas hinagtay ataw ka éhê palas manuk eglepal, 18ataw ka éhê palas sa medoo eg-ipanawpanaw diyà tanà ataw ka diyà wayeg. 19Owoy yoko egpenemula duu sa medoo eghauwen yu diyà langit, upama sa agdaw ataw ka sa bulan ataw ka sa medoo bituen. Enù ka si Datù Nemula, sa Nemula egpigtuuwen yu, sa migpeduen iya wé anì hauwen sa langun etaw diyà siini sinukub langit. 20Dodoo kiyu sa etaw inalukan di dutu Igiptu dò kenà yu nepasangan temù. Inuwit di kiyu kedu dutu anì mebaluy kiyu dé sa etaw di taman ini egoh di. 21Na, binulitan i Datù Nemula aken danà yu, huenan di migpasad endà mekebatas a diyà sa lawa't wayeg Holdan mangay diyà sa mepion tanà mebaluyan

hinemulaan sa tanà ibegay i Datù Nemula diyà keniyu. 22Mematay a diyà siini tanà owoy endà mekebatas a diyà sa lawa't wayeg Holdan. Dodoo kiyu, mekebatas yu doo anì mekuwa yu siedò mepion tanà kebaluyan. 23Huenan di, tuliki yu anì endà melipengan yu duu sa nesepasadan binaelan i Datù Nemula diyà keniyu. Pangunuti yu sa uledin di anì endà mael yu sa inetaw penemulawen yu. 24Enù ka si Datù Nemula sa Nemula egpigtuuwen yu, kagdi sa lagà dakel apuy enù ka épê dakel egkegaga mekepigtamay etaw owoy mangabiyu ma amuk duen sa liyu egpenemulawen yu.”

**Ini Sa Tigtu Mapulù
Uledin I Nemula**

(Dutilonomiyu 6:1–9)

6 1Agulé guwaen i Mosis, “Na, ini sa langun uledin igsugù i Datù Nemula, sa Nemula egpigtuuwen yu, anì itulù ku diyà keniyu. Pangunuti yu ini i amuk mugpà yu diyà sa tanà buyu tepelen yu. 2Taman sa egoh yu nehagtay pelawà owoy sa medoo tugod yu ma, adati yu Datù Nemula i sa egpigtuuwen yu owoy pangunuti yu ma sa langun uledin di tinulon ku diyà keniyu anì kumelalù yu mugpà diyà siedò tanà. 3Huenan di, kiyu i medoo tegeIslaél, dinegdineg yu



Igpolot da sa uledin diyà sa kilay da. (Dutilonomiyu 6:8)

siini medoo uledin owoy tigtu pangunuti yu ma. Amuk hediya, kumepion sa keugpà yu owoy meguwad yu ma diyà sa melabel tanà mebaluyan sa langun hinemulaan, éhê mendaa sa igpasad i Datù Nemula, sa Nemula egpigtuuwen sa medoo tupù ta.”

⁴Guwaen i Mosis, “Taa yu, hih, kiyu i medoo tegeIslaél. Iya daa sa tigtu nemula si Datù Nemula sa egpigtuuwen ta. Endà duen sa liyu nemula. ⁵Huenan dí, pusungi yu Datù Nemula i sa egpigtuuwen yu, owoy peunuti yu ma diyà

kenagdi sa langun pedu yu owoy sa langun egkegaga yu ma.^a ⁶Yoko egkelipeng duu siini medoo uledin tinulon ku diyà keniyu ini egoh di. ⁷Temù yu tului diyà sa medoo anak yu owoy takà yu ma olom amuk duen sa egbaelan yu ataw ka sumalà dé sa kenà yu, iling ka diyà yu sa dalan ataw ka diatas yu, iling ka eghibat yu ataw ka eg-enaw yu. ⁸Poloti yu sa uledin diyà sa belad yu anì metulengan yu owoy diyà sa kilay yu ma anì mepenemdem yu. ⁹Owoy sulati yu ma diyà sa kilidan pintù sa dalesan yu

^a 6:5 Basa ko Matéyo 22:37; Malkos 12:29,30, owoy Lukas 10:27.

owoy diyà sa selat sa menuwa yu anì metulengan yu takà.”

Tinulon I Mosis Sa Mebaelan Da Amuk Endà Egpangunut Da Diyà Si Nemula

(Dutilonomiyu 6:10–19)

10Agulé mig-uman Mosis i eg-ikagi, guwaen di, “Na, iya sa igpasad i Datù Nemula sa egpigtuuwen yu diyà sa medoo tupù yu, si Ablaham owoy si Isak owoy si Hakob, sa egoh di megay diyà keniyu sa tanà tapay dé duen sa medoo metolol dakel menuwa binaelan sa medoo liyu etaw. 11Duen ma sa medoo dalesan nepenù sa medoo mepion sa endà itagù yu duu, owoy duen ma sa medoo paligì sa endà kinalì yu duu owoy sa medoo hinemulaan endà hinemula yu duu. Amuk uwiten i Datù Nemula kiyu diyà siedò tanà owoy duen dé sa langun egkeiyapan yu kumaen, 12tulik yu anì endà melipengan yu duu Datù Nemula i sa mig-aluk keniyu kedu Igiptu dò kenà yu neudipen. 13Adati yu Datù Nemula i sa egpigtuuwen yu anì kagdi daa sa penemulawen yu owoy anì kagdi ma daa sa pengibeti yu amuk peelesen yu sa pasad yu. 14Yoko egpenemula duu sa

inetaw egpenemulawen sa medoo liyu etaw eg-ugpà medapag diyà keniyu. 15Enù ka amuk penemulawen yu sa inetaw, tigtu bulitan i Datù Nemula kiyu owoy pigtamayan di ma kiyu lagà sa kekaen apuy taman meimet yu mekedan diyà tanà. Enù ka mangabiyu Datù Nemula i, sa Nemula egpigtuuwen yu, amuk duen sa liyu egpenemulawen yu.”

16Guwaen i Mosis, “Yoko egtepengan si Datù Nemula, sa Nemula egpigtuuwen yu, éhê sa binaelan yu egoh yu diyà sa wayeg Masa.^b 17Dodoo tulik yu anì mepangunutan yu sa langun uledin igbegay di diyà keniyu. 18Baeli yu sa mepion owoy sa metudà diyà sa kehaa i Datù Nemula. Amuk hediya, kumepion sa kehagtayan yu owoy mekuwa yu ma sa mepion tanà kebaluyan, sa tanà igpasad i Datù Nemula diyà sa medoo tupù yu, 19enù ka hemagawan di sa medoo kuntelà yu éhê mendaa sa igpasad di.”

Ini Sa Egoh I Mosis Migpepetulengtuleng Sa Kepangunut Da Diyà Si Nemula

(Dutilonomiyu 8:1–6)

8 1Na, mig-ikagi dema Mosis i, guwaen di, “Tulik

^b 6:16 Basa ko Éksodo 17:1-7 denu sa binaelan sa medoo tegeIsaél diyà sa wayeg Masa.

yu anì tigtu yu pangunut diyà sa langun uledin tinulon ku diyà keniyu ini egoh di. Amuk hediya, kumelalù yu owoy meguwad yu owoy metepel yu ma sa tanà igpasad i Datù Nemula diyà sa medoo tupù yu egoh anay. ²Ketulengi yu ma sa medoo binaelan i Datù Nemula egoh di mig-uwit keniyu sa egoh yu migseesud-esud diyà sa melabel tanà mediyù dalesan taman epat pulù gepalay. Pinelihay di kiyu enù ka egtepengan di anì metiigan di sa pedu yu amuk tigtu yu egpangunut diyà sa uledin di ataw ka endà. ³Pinetues di kiyu, agulé pinekaen di kiyu sa mana, sa kaenen endà pa netukawan yu duu lapeg sa medoo tupù yu. Iya sa binaelan di anì ipetiig di diyà keniyu beken kaenen daa sa mekepelalù etaw, dodoo sa kepangunut da polo diyà sa langun kagi i Datù Nemula. ⁴Owoy diyà siini epat pulù gepalay sa egoh yu migseesud-esud, endà nemoot sa ginis yu owoy endà ma miglebag sa lisen yu.”

⁵Guwaen i Mosis, “Ketulengi yu ma si Datù Nemula sa epgigtuuwen yu sa egtulù keniyu owoy sa eg-indaw keniyu lagà mendaa sa maama eg-indaw sa medoo anak di. ⁶Huenan di, baeli yu dé sa medoo igsugù i Datù Nemula diyà keniyu. Pangunuti yu sa

langun uledin di owoy adati yu ma.”

Ini Sa Tinulon I Mosis Sa Ketabang I Nemula Diyà Kenagda

(Dutilonomiyu 9:1–4)

9 ¹Mig-ikagi dema Mosis i, guwaen di, “Na, dineg-dineg yu, hih, kiyu i medoo tegeIslaél. Buyu dé meuma sa egoh yu matas diyà sa wayeg Holdan anì tepelen yu sa tanà sa medoo etaw uman pa mebagel diyà keniyu owoy eglowon ma sa egkegaga da diyà sa niyu egkegaga. Dakel sa medoo menuwa da owoy mehagtaw ma sa kutà da. ²Mehagtaw sa medoo etaw dahiya owoy mebagel da ma, enù ka kagda sa dakel etaw tugod i Anak. Netiigan yu doo sa inikagi etaw, guwaen da, ‘Endà duen etaw mekeatu diyà sa medoo tugod i Anak.’ ³Dodoo ini egoh di hauwen yu sa baelan i Datù Nemula, sa Nemula epgigtuuwen yu, enù ka kagdi sa humuna diyà keniyu mekeiling sa dakel legleg apuy egpekedelegpà diyà kenagda. Atuwan di kagda ligò yu egseilud-ilud egpeka sa tanà da. Amuk hediya, mehemagawan yu doo kagda owoy medelamet da megelà, éhê mendaa sa igpasad i Nemula diyà keniyu. ⁴Na, amuk hinemagawan i Datù Nemula dé kagda egoh yu egtepel sa tanà da, yoko

egpenemdem duu danà sa ketiengaw yu sa pesuwan i Nemula migbegay sa tanà da diyà keniyu. Endà tuu iya wé, enù ka danà sa medaet egbaelan da polo sa pesuwan i Datù Nemula humemaga kenagda kedu diyà sa tanà da.”

Ini Sa Egoh I Mosis Migtulon Sa Ungayà I Nemula

(Dutilonomiyu 10:12–22)

10 ¹²Agulé guwaen i Mosis, “Na, kiyu i medoo tegeIslaél, ini sa sasà i Datù Nemula diyà keniyu. Adati yu kagdi i, owoy pangunuti yu sa langun igsugù di. Pusungi yu kagdi owoy baeli yu ma sa ungayà di danà sa pedu yu migkepion. ¹³Owoy pangunuti yu ma sa langun uledin i Datù Nemula egtulonen ku diyà keniyu ini egoh di enù ka iya sa kenà yu mekehaa sa mepion. ¹⁴Taa yu, hih. Si Datù Nemula sa épê sa langun langit owoy sa tanà owoy sa langun eghauwen ta dahiya. ¹⁵Dodoo danà sa dakel kehidu i Datù Nemula sa medoo tupù yu, huenan di hinemilì di kiyu i medoo tugod da kedu diyà sa langun balangan etaw, owoy taman ini egoh di kiyu sa etaw hinemilì di. ¹⁶Huenan di, edung ini egoh di, kedani yu dé sa medaet adat yu owoy sabuhi yu ma sa kepetegas yu sa ulu yu. ¹⁷Enù ka si Datù Nemula sa Nemula

egpigtuuwen yu, kagdi daa sa eglowon diyà sa langun egpenemulawen etaw owoy kagdi ma daa sa eglowon diyà sa langun épê egkegaga. Kagdi sa tigtu mapulù owoy sa meolò etaw owoy sa épê dakel tunung. Nesetepeng sa kehaa di sa langun etaw, endà duen sa tayu egtampilan di, owoy endà ma mebaluy di limunan di pilak sa ketuu. ¹⁸Egtabangan di sa bayi balu owoy sa ilu anì kumepion sa mebaelan da. Eghiduwan di ma sa medoo etaw beken tegeIslaél mig-angay eg-ugpà diyà kenita i tegeIslaél, owoy egbegayan di ma kagda kaenen owoy ginis. ¹⁹Huenan di, hiduwi yu ma sa medoo etaw beken duma yu tegeIslaél, enù ka beken ma tigtu yu etaw dutu Igiptu dò egoh anay. ²⁰Adati yu ma Datù Nemula i sa Nemula egpigtuuwen yu owoy kagdi daa sa penemula yu. Owoy uman yu ma peeles sa kesalig yu diyà kenagdi, owoy kagdi daa sa pengibeti yu amuk peelesen yu sa igpasad yu. ²¹Olò yu ma kagdi i, enù ka kagdi sa Nemula egpigtuuwen yu owoy hinaa yu ma dé sa medoo panduan egkegaipan etaw binaelan di diyà keniyu. ²²Egoh anay pitu pulù daa sa kedoo tupù ta egoh da mig-edoh dutu Igiptu dò, dodoo ini egoh di pinedoo i Datù Nemula kiyu, enù ka lagà yu dé sa kedoo bituen diyà langit.”

**Ini Sa Egoh I Mosis Mighawid
Kenagda Eg-iling Sa Adat Sa
Medoo Tapay Etaw**

(Dutilonomiyu 18:9–13)

18 ⁹Agulé guwaen i Mosis, “Amuk mekeupà yu dé diyà sa tanà ibegay i Datù Nemula diyà keniyu, yoko eg-iling duu sa medaet adat sa medoo tapay etaw dutu. ¹⁰Yoko eg-imatay duu sa anak yu anì ulowen yu diyà sa kenà yu egsimbà. Yoko eg-iling duu sa egketiigan da eg-alamat, iling ka sa ketulon da sa endà pa tumbow di, ataw ka sa keselepang da sa tandà, ataw ka sa kegambut da, ¹¹ataw ka sa lambus. Yoko ma eg-iling duu sa keumow da sa busaw ataw ka sa suguy sa nematay. ¹²Enù ka si Datù Nemula sa Nemula egpigtuuwen yu, tigtu egkelepuhan di sa etaw egbael éhê iya wé. Iya maen di ya eghemagawan di sa medoo balangan etaw kedu diyà sa tanà angayan yu. ¹³Dodoo kiyu, tigtu yu pangunut temù diyà si Datù Nemula.”

**Ini Sa Inikagi I Mosis Denu Sa
Tegesugkow Kagi I Nemula**

(Dutilonomiyu 18:14–22)

¹⁴Agulé guwaen i Mosis, “Na, sa medoo etaw diyà sa tanà buyu dé tepelen yu, egpigtuu da diyà sa medoo tegealamat owoy

sa medoo tegeselepang tandà. Dodoo si Datù Nemula sa Nemula egpigtuuwen yu, hinawidan di kiyu egbael éhê iya wé. ¹⁵Enù ka hemilien di polo sa tegesugkow sa kagi di lagà mendaa kenak kedu diyà sa kedoo yu, owoy iya daa sa pangunuti yu.”

¹⁶Guwaen i Mosis, “Egoh anay egoh yu nesetipon diyà sa Getan Sinay, migpegeni yu anì endà dé dinegen yu duu uman sa eg-ikagiyan i Datù Nemula owoy migpegeni yu ma anì endà ma dé hauwen yu duu uman sa dakel siloy apuy sa tandà di, enù ka guwaen yu dò memamatay yu. ¹⁷Huenan di, mig-ikagi Datù Nemula i diyà kenak, guwaen di, mepion sa kepegeni da. ¹⁸Hemilien di gaa sa tegesugkow sa kagi di lagà medaa kenak kedu diyà sa medoo duma da tegeIslaél. Tulonen i Nemula diyà kenagdi sa ikagiyan di owoy tulonen di diyà sa medoo etaw i Nemula sa langun igsugù di. ¹⁹Isugkow di sa kagi i Nemula diyà kenagda, owoy pigtamayan i Nemula doo sumalà dé sa etaw endà migtuu diyà sa kagi di. ²⁰Dodoo amuk duen sa etaw ubdubò egsugkow sa kagi i Nemula dodoo endà sinugù di duu, meimatayan doo danà iya wé binaelan di. Hediya ma, meimatayan ma sa tegesugkow egtulon sa kagi sa medoo liyu egpenemulawen.”

21Mig-ikagi dema Mosis i, guwaen di, “Iya kéen sa igsà yu ngadan sa ukit yu meketiig amuk kedu diyà si Datù Nemula sa kagi sa tegesugkow, ataw ka endà. 22Ini sa ukit yu meketiig iya wé. Amuk duen sa tegesugkow egtulon gaa sa kagi i Datù Nemula, dodoo amuk endà meketuu sa inikagi di, iya sa tandà di beken kedu si Datù Nemula sa inikagi di. Amuk hediya, legkang diyà sa hagdi penemdem daa sa eg-ikagiye di, huenan di yoko egkelimedangan na diyà kenagdi.”

**Ini Sa Egoh I Mosis Migpehemili
Diyà Kenagda Sa Mepion Ataw
Ka Sa Medaet**

30 1Agulé guwaen i Mosis, “Egpehemilien ku kiyu ngadan sa tayu egkeiyapan yu, iling ka sa mepion ketabang i Datù Nemula sa Nemula egpigtauwen yu ataw ka sa kepigtamay di keniyu. Amuk meuma sa egoh yu mepasangan amuk mekeangay yu owoy sa medoo tugod yu diyà sa medoo liyu tanà kenà i Datù Nemula sumepalak keniyu, metulengan yu doo sa egoh ku migpehemili keniyu. 2Agulé amuk pelikù yu dema diyà si Datù Nemula, kiyu i owoy sa medoo tugod yu, owoy amuk tigtu yu dema mangunut diyà sa medoo uledin di egtulonen ku diyà keniyu ini

egoh di, 3hiduwan i Datù Nemula doo kiyu. Pelikuen di ma kiyu owoy sa medoo tugod yu kedu diyà sa medoo tanà kenà di sumepalak keniyu anì mesetipon yu dema diyà sa niyu tapay tanà owoy ipelikù di dema diyà keniyu sa éhê sa tapay langun taman yu. 4Apiya di pa mesepalak sa medoo tugod yu dutu mediyù tanà dò, setiponen i Datù Nemula doo kagda owoy pelikuen di ma kagda 5anì mehagda dema sa tanà ibegay di diyà keniyu i medoo tupù da. Amuk hediya, uman pa pedoowen di kagda owoy uman pa pekawasaen di kagda diyà keniyu i medoo tupù da. 6Owoy begayan i Datù Nemula kiyu owoy sa medoo tugod yu ma sa pedu yu meiyap mangunut diyà kenagdi, anì ipusung yu kagdi i owoy ipeunut yu ma diyà kenagdi sa langun pedu yu. Amuk hediya, kumelalù yu mugpà diyà iya wé tanà. 7Sumabuh migtamay keniyu owoy pigtamayan di polo sa medoo kuntelà yu melepuh keniyu owoy sa melihay keniyu. 8Agulé migtuu yu dema diyà kenagdi owoy mangunut yu ma diyà sa langun uledin di egtulonen ku diyà keniyu ini egoh di. 9Kumawasà yu dema enù ka tabangan i Datù Nemula kiyu diyà sa langun egbaelan yu. Dumuen sa medoo anak yu owoy kumedoo ma sa hinagtay yu owoy

sumubela ma sa bunga sa hinemula yu. Meiyapan i Datù Nemula dema kiyu pekawasà lagà mendaa sa kekeiyap di pekawasà sa medoo tupù yu egoh anay. ¹⁰Dodoo amuk iya sa egkeiyapan yu, pigtuu yu daa diyà si Datù Nemula owoy pangunuti yu ma sa langun uledin di igsulat diyà siini libelu owoy peunuti yu ma sa langun pedu yu diyà kenagdi.”

¹¹Guwaen i Mosis, “Endà melikutan yu mangunut diyà siini uledin egtulonen ku diyà keniyu ini egoh di. Huenan di, yoko egpenemdem duu endà megaga yu duu mangunut. ¹²Endà dutu di langit dò. Huenan di, endà duen pesuwan yu mikagi, guwaen yu, ‘Ngadan di etaw sa mebatun anì ihated di diyà kenita anì medineg ta owoy anì mepangunutan ta?’ ¹³Owoy endà ma dutu di tanà dutu't dagat dò. Huenan di, endà ma duen pesuwan yu mikagi, guwaen yu, ‘Ngadan di etaw sa mangay tanà dutu't dagat dò anì ihated di diyà kenita anì medineg ta owoy anì mepangunutan ta?’ ¹⁴Dodoo medapag doo sa uledin di diyà keniyu enù ka diyà sa penemdem yu owoy diyà sa ebà yu ma, huenan di mepangunutan yu doo.”^c

¹⁵Guwaen i Mosis, “Na, pehemilien ku kiyu ini egoh di ngadan sa tayu meiyapan yu, iling ka sa mepion ataw ka sa medaet, iling ka sa lalù ataw ka sa kepigtamay. ¹⁶Amuk pangunutan yu sa langun uledin i Datù Nemula egtulonen ku diyà keniyu ini egoh di owoy amuk ipusung yu ma Datù Nemula i sa Nemula egpigtuuwen yu owoy amuk unutan yu ma sa uyot di, kumelalù yu doo owoy meguwad yu ma owoy mebegayan i Datù Nemula ma kiyu sa mepion diyà sa tanà buyu dé tepelen yu.

¹⁷“Dodoo amuk meked yu mangunut diyà sa medoo uledin di owoy amuk meked yu ma migtuu diyà kenagdi danà yu egpenemula sa inetaw, ¹⁸mepigtamayan yu doo. Meketuu doo sa medoo tinulon ku diyà keniyu ini egoh di. Endà melugay yu muggà diyà sa tanà dutu lawa't Holdan sa tanà buyu dé tepelen yu. ¹⁹Tigtu miulan ini i egtulonen ku diyà keniyu. Amuk egpekeikagi daa hedem sa langit owoy sa tanà, mikagi da doo anì ipetultengtuleng da diyà keniyu sa hinemilì yu dinineg da ini egoh di. Na, ini sa ipehemilì ku diyà keniyu, meiyap yu pa sa mepion ibegay i Nemula ataw ka sa kepigtamay

^c 30:12–14 Basa ko Loma 10:6–8.

di keniyu? Meiyap yu pa sa lalù yu ataw ka sa kepatay yu? Na, hemili yu dé sa lalù ani kumelalù yu lapeg sa medoo tugod yu ma. **20**Pusungi yu Datù Nemula i sa Nemula egpigtuuwen yu, owoy pangunut yu ma diyà kenagdi. Yoko eglengà ya diyà kenagdi anì kumelalù yu, kiyu i owoy sa medoo tugod yu, anì melugay yu mugpà diyà sa tanà igpasad di ibegay diyà sa medoo tupù yu, si Ablaham owoy si Isak owoy si Hakob.”

Ini Sa Egeh I Mosis Miggelal Si Hosuwa Sa Mekesambì Kenagdi

(Dutilonomiyu 31:1–8)

31 ¹Na, mig-uman Mosis i eg-ikagi diyà sa medoo tegeIslaél, ²guwaen di, “Lukes a dé. Melatuh duwa pulù a dé gepalay, huenan di endà dé mebaluy di aken sa pangulu yu owoy tinulon i Datù Nemula ma diyà kenak endà dé mekebatas a diyà sa lawa't wayeg Holdan. ³Iya sa humuna diyà keniyu amuk matas yu si Datù Nemula sa Nemula egpigtuuwen yu, owoy gelaen di ma sa medoo balangan etaw eg-ugpà dahiya anì metepel yu sa tanà da. Owoy mebaluy si Hosuwa sa pangulu yu, enù ka iya sa inikagi i Datù Nemula. ⁴Na, gelaen i Datù Nemula sa medoo etaw dahiya, lagà mendaa sa egoh di mig-atu si Sihon owoy si Og, sa duwa datù diyà sa

medoo etaw Amoliya, egoh di migpedaetan sa tanà da.

⁵Petabanen i Datù Nemula kiyu diyà kenagda, owoy baeli yu diyà kenagda sa langun tinulon ku diyà keniyu. ⁶Pebalaw yu owoy pebagel yu ma sa pedu yu. Yoko egkelenawan na. Yoko ma egkelimedangan na diyà kenagda, enù ka si Datù Nemula sa Nemula egpigtuuwen yu sa umunut-unut diyà keniyu. Endà salidan di duu kiyu owoy endà ma iniyugan di duu kiyu.”

⁷Agulé igpeangay i Mosis Hosuwa i, owoy inikagiyan di diyà sa taengan sa langun tegeIslaél, guwaen di, “O Hosuwa, pebalaw ka owoy pebagel ko ma sa pedu ko, enù ka kuna dé sa umuwit siini medoo duma ta tegeIslaél anì mekuwa da sa tanà igpasad i Datù Nemula diyà sa medoo tupù ta. ⁸Si Datù Nemula sa humuna diyà keniko owoy umunut-unut ma diyà keniko. Endà salidan di duu kuna owoy endà ma iniyugan di duu. Huenan di, yaka egkelenawan na owoy yaka ma egkelimedangan na.”

Ini Sa Sabuhanan Kagi I Mosis

(Dutilonomiyu 32:45–52)

32 ⁴⁵Na, egoh i Mosis neubus migtulon sa langun uledin i Nemula diyà sa medoo tegeIslaél, ⁴⁶guwaen di, “Tagui yu diyà sa pedu yu sa

langun uledin tinulon ku diyà keniyu ini egoh di anì pangunutan yu. Owoy tului yu ma diyà sa medoo anak yu anì tigtu da ma mangunut diyà sa langun uledin i Nemula. ⁴⁷Enù ka beken uloy kagi daa ini i ketulù ku diyà keniyu, dodoo mekepelalù polo keniyu. Huenan di, pangunuti yu anì kumelalù yu umugpà diyà sa tanà sa tanà dutu lawa't Holdan sa buyu dé tepelen yu.”

⁴⁸Na, egoh iya wé agdaw, inikagiyan i Datù Nemula Mosis i, ⁴⁹guwaen di, “Angay ka dé diyà sa medoo tuduk Abalim diyà sa tanà Moab denu dibaluy sa menuwa Héliko anì tumekedeg ka diyà sa getan Nibo anì sugpayalen ko sa tanà Kanan ibegay ku diyà sa medoo tegeIslaél. ⁵⁰Mematay ka dutu siedò getan lagà mendaa sa kakay ko si Alon nematay dutu getan Hol dò, ⁵¹enù ka endà egsaligan yu duu aken egoh yu diyà sa taengan sa medoo tegeIslaél. Egoh yu diyà sa wayeg Méliba^d medapag diyà sa menuwa Kades diyà sa melabel tanà Sin mediyù dalesan, endà igpehaa yu duu sa kenemulawan ku diyà sa taengan sa medoo etaw. ⁵²Huenan di, sugpayalen ko daa sa tanà ibegay ku diyà sa

medoo tegeIslaél, dodoo endà mekeangay ka dutu.”

Ini Sa Egoh I Mosis Nematay

34 ¹Agulé kedu diyà sa sugud Moab Mosis i owoy migtekedeg diyà sa getan Nibo taman diyà sa pulu tuduk Pisga sa denu tebowon agdaw amuk diyà ki sa menuwa Héliko. Dutu igpesugpayal i Datù Nemula diyà kenagdi sa uwang tanà Kanan, edung diyà sa uwang tanà Galaad taman sa uwang tanà denu belabagan sa mekuwa sa medoo tugod i Dan, ²owoy sa uwang tanà mekuwa sa medoo tugod i Naptali owoy sa uwang tanà mekuwa sa medoo tugod i Ipelaim owoy sa medoo tugod i Manasa. Hinaa di ma sa uwang tanà mekuwa sa medoo tugod i Huda taman sa Dagat Méditeliya denu eledan agdaw, ³owoy sa tanà Negeb denu kimataan, owoy sa sugud nekeedung diyà sa menuwa Sowal taman sa menuwa Héliko kenà di duen medoo éhê lawa't palas lepò. ⁴Agulé mig-ikagi Datù Nemula i diyà si Mosis, guwaen di, “Iya sa tanà igpasad ku diyà sa medoo tupù yu, si Ablaham owoy si Isak owoy si Hakob, sa tanà ibegay ku diyà sa medoo tugod da. Igpehaa ku daa diyà

^d 32:51 Basa ko Kabilang 20:1–13 denu sa nebaelan da dutu Méliba dò.

keniko, dodoo endà mekeangay ka dutu.”

⁵Na, nematay Mosis i sa sinaligan i Datù Nemula dutu siedò tanà Moab, enù ka neketuu sa inikagi i Datù Nemula. ^{6,7}Melatuh duwa pulù gepalay sa kelukes di egoh di nematay, dodoo tapay doo mebagel sa lawa di owoy tapay ma doo meilag. Agulé iglebeng i Datù Nemula diyà sa sebaen sugud diyà sa tanà Moab denu dibaluy sa menuwa Bétpiyol. Dodoo taman ini egoh di endà duen etaw neketiig sa tigtu kenà sa lebeng di. ⁸Agulé neulaanan sa medoo tegeIslaél Mosis i owoy egdelawit da taman telu pulù agdaw diyà sa sugud diyà sa tanà Moab.

⁹Na, tigtu migkilantek Hosuwa i anak i Nun danà i Mosis migtenà sa belad di diyà sa ulu di anì egtandaan di si

Hosuwa sa mekesambi kenagdi. Huenan di, pinangunutan sa medoo tegeIslaél Hosuwa i owoy pinigtuu da ma sa medoo uledin i Datù Nemula igsugkow i Mosis diyà kenagda.

¹⁰Na, edung egoh iya, endà dé duen sa liyu tegesugkow i Nemula diyà sa medoo tegeIslaél nekeiling si Mosis sa sinetawit i Datù Nemula.

¹¹Endà ma duen sa liyu tegesugkow i Nemula egpekebael panduan éhê sa igpebael i Datù Nemula diyà si Mosis dutu Igiptu dò egoh di migbael panduan diyà si Datù Palo owoy diyà sa medoo salu di owoy diyà sa uwang tanà Igiptu. ¹²Owoy endà ma duen sa liyu tegesugkow i Nemula egpekebael sa panduan egkegaipan etaw éhê sa binaelan i Mosis diyà sa taengan sa medoo tegeIslaél.